

1 Jon

Jon Minj Nind Tikak

Minim Nind Niḡep

Bi Jiysis minim dand amemb Jon, minj day nind tikak biy, biynimb Gor apiymiḡay kuyip chingipay gok aḡrep gen, minim yesek aḡḡimbay ak ma diniḡiy aḡiy tikak. Bi Gor minim yesek aḡep kun gok, minim tuḡandikiy, biynimb gok kuyip aḡyiḡipay, “Mindmaḡiy key tikjakniḡamb rek gon, Gor chinup tap bap ma giniḡamb aḡiy” monmon giyiḡ, Jiysis biyimb ay owak aḡiy ma niḡiy, binuk gok kuyip miluk niḡyiḡipay.

Kun gey Jon, Jiysis Krays biyimb ay owak ak aḡḡiḡep gen, niḡrep giy, nup gosimb niḡiy, Gor nup wasemb ay, penpen wasemb ayep ak niḡrep giniḡiy aḡiy, minj kun biy tikak.

Minim Ar Keykey Mindip Rek:

Minim nind aḡgak ak mindip, chapta 1:1-4.

Gor kind ak sek, kisiyim kind ak sek minim ak mindip, chapta 1:5–2:29.

Gor ḡapan nuk gok sek, Seytan ḡapan nuk gok sek minim ak mindip, chapta 3:1-24.

Gor Kawnan tep nuk ak kuyip gos ḡek aspay akan, Seytan kichekiy malḡiluk tap gok gos ḡek aspay akan aḡiy, niḡrep giy nep, minim kuyip ak dinimimb aḡgak minim ak mindip, chapta 4:1-6.

Wasemb ayep miḡ ar ak mindip, chapta 4:7-21.

Biynimb Jiysis nup Gor ḡinuk yimb aḡiy, nup gosimb niḡbay gok minim ak mindip, chapta 5:1-21.

Minim Maḡiy Won Permindep Ak

1 ¹ Miḡmon alwol gayak ḡin ak, Minim Maḡiy Won ak Nop yip mindek. Pen nuk kisen ḡin biy nep apek, windin chin key niḡiy, minim aḡek timund chinup ak sikek, ḡin maḡiy chin key ak nup diniḡnuk. ² Bi gek per mindeniḡambay kun ak, Nop yip mindiy, chinup per mindeyaḡ aḡiy apek, misenḡ niḡiy mey, nimbip aspun. ³ Nup windin

niņiy, minim nup ak niņiy diy mey, kiy apiymiņay yip jimņiy mindpun. Pen nimbip minim kun ak aņgon niņiy dem mey, chin maņgiysek Gor apiymiņay yip jimņiy mindiy, kiņiņ nokom mindoniņgambun. ⁴Kun gem mey, tep yimb giniņgamb aņgiy, minj biy tiksipun.

Melik Ar Ak Taņgonjun

⁵Krays chinup aņgek niņnuk minim ak, nimbip aņgņiniņg gispiyn. Gor melik yimb mindip; kisyim sek ma mindip. ⁶Kun ak chin tap siy tap timey gi mindiyiņg, Gor yip jimņiy mindpun aņgņiņgambun ak; minim nuk niņind yimb ak kirgiy, kisyimnamb okok mindiy, yesek ar ak gi dand amyiņg, kun aņgņiņgambun. ⁷Pen Gor yip mindiy, melik nup ar ak taņgiy jimņiy mindon, Niņuk chinup aņgiy likaņ yapek kumak rek, gach chinup wiykyokiņiņg nep mindeniņgamb.

⁸Pen tap siy tap timey gunap ma gipun aņgņiņgambun ak; gos nep niņiy, Gor minim ak ma diy kun aņgņiņgambun. ⁹Pen tap siy tap timey gipun gok, Gor nup aņgyikoniņgambun; nuk Bi suņ-tep mindip rek, chinup niņiy kirginiņgayn aņgak rek giniņgamb.

¹⁰Pen tap siy tap timey ma nep gipun aņgņiņgambun ak, Gor minim nuk yesek aņgiy aņgiy, minim nup ak ma diy mey, kun aņgņiņgambun.

Krays Chinup Simb Niņiy Nop Nup Aņgņiņ Mindip

2 ¹Ñapan yand gok. Nimbip minj tiksipiyn ak, tap siy tap timey ma ginimimb aspiyn. Pen tap siy tap timey geniņgambim, Jiysis Krays chinup simb niņiy, Nop nup aņgņiņyiņg nep mindip rek, tap siy tap timey gipay ak, niņiy kirginimin aņgņiņgamb. ²Niņuk tap siy tap timey key ma giy, chinup aņgiy kumek mey, Nop tap siy tap timey gipun ak, niņiy kirginiņgamb. Chinup nep mer, biynimb okok maņgiysek tap siy tap timey gipay ak, niņiy kirginimuņ rek mindip.

³Chin Gor aņgip rek gi mindiy mey; nup gosimb niņbun ak, niņrep gipun. ⁴Biynimb gunap Gor biynimb nuk mindpun aņgiy pen; aņgip rek ma giniņgambay ak, yesek yimb aņgņiņgambay. Minim aņgņiņgambay kun ak, Bi minim niņind nep aņgip ak yip mindiy, ma aņgņiņgambay. ⁵⁻⁶Biynimb Gor aņgip rek gipay gok, Gor nup gosimb niņbay. Pen biynimb nup gosimb ma niņbay gok, biynimb nuk ma mindpay. Krays ker mindpay biynimb gok, nuk gip rek nep giniņgiy. Nuk gip rek giy mey; nuk yip jimņiy mindpun aņgiy niņrep gipun.

Penpen Wasemb Aynimimb

⁷⁻⁸Buņgiy yand Krays ker mindpim gok. Minim aņgņiņg gispiyn ak niņem, minim kisenimb rek ayiņgamb ak pen; minim nindnimb wosrey dipik ak nimbip aspiyn. Minim kun ak mey; penpen wasemb aynimimb. Krays biynimb gok kuyip wasemb ayip rek, nimb niņiy kunep gipim ak

niḡbun. Wasemb aynimimb minim kun ak, minim niḡind yimb; chinup sup rek ak puḡgyomimb.

⁹Biynimb mam ay gunap kuyip miluk niḡyḡḡ, Gor melik nup diy, biynimb nuk yimb mindpun aḡḡniḡgambay ak; minim nep aḡḡniḡgambay. Biynimb kun gok rek, kisyimnamb ak nep mindpay.

¹⁰Biynimb mam ay gok kuyip wasemb aypay gok, Gor melik tep ar ak mindpay. Biynimb gunap kuyip monmon gey, ma apyap pikniḡgambay.

¹¹Pen biynimb mam ay gok kuyip miluk niḡniḡgambay gok, kisyim kind ak mindiy, piḡiy aran apyan giyḡḡ, amḡipun miḡḡan ak aḡḡiy, ma niḡbay.

¹²ḡapan yand gok. Krays yimb tep mindip rek, Nop nimbip tap siy tap timey giḡim ak niḡiy kirgeḡ mey, nimbip minḡ tiksiḡiy.

¹³Nimb biyomb gok; Bi nind kiḡiḡ giy mindek ak nup niḡbim rek, nimbip minḡ tiksiḡiy.

Nimb bi paranḡ gok; Gor minim ak diy, bi timey ak yip penpen gi wiyniyḡ giy mindḡim rek, nimbip minḡ tiksiḡiy.

Nimb ḡapan gok; Bapiy Gor nup niḡbim ak mey, nimbip minḡ tiksiḡiy.

¹⁴Nimb biyomb gok; Krays bi nind yimb mindek ak nup niḡbim ak mey, nimbip minḡ tiksiḡiy.

Nimb bi paranḡ gok; Gor minim ak diy, Seytan nup kirgiy mindrep giḡim ak mey, nimbip minḡ tiksiḡiy.

Tap Mankumb Biy Ker Gok Mindmaḡiy Ma Aynimimb

¹⁵Gor ker ma mindpay gok, miḡiḡ giḡay ar ak giḡjun aḡḡiy, ma niḡnimimb. Gos nimbip tap lum ar biy am kom kom geḡ, Gor nup gos ak kirgiḡniḡgambim. ¹⁶Biynimb tap lum ar biy gosimb niḡbay gok, windin niḡiy gos timey wip rek giy, mindmaḡiy key limḡip rek giy, yimb yomb diḡjun aḡḡiy niḡbay rek gey amimb. Gor kuyip gos ḡek kun ma giḡay; nup ma chiḡḡipay rek, gos kun ak niḡiy ar kun ak ambay. ¹⁷Tap gos lip giḡ kun gok, pisnep kurgiḡniḡ giḡap ak pen; biynimb Gor giyaḡ aḡḡiy niḡimb rek giḡay gok, perper mindeniḡgambay.

ḡin Kisen Ak Maḡ Mindip

¹⁸ḡapan yand gok. ḡin kisen ak maḡ mindip. Bi Krays nup miluk niḡep ak, biyomb rek ayek nup niḡniḡgambay aḡḡyak ak niḡbim. Miḡiy biynimb Krays nup miluk niḡbay gok kuḡay mindpay ak mey, ḡin kisen ak, maḡ mindip ak niḡbun.

¹⁹Biynimb Krays nup miluk niḡbay kun gok, biynimb chin yimb mindembiyap rek, chinup kirgiy keykey ma ambiyap. Kun giy kiriḡ keykey amniyak rek, biynimb chin yimb ma mindpay ak, miseḡ yimb niḡbun.

²⁰Pen Krays, Gor Kawnan yokek ap nimb yip mindakniḡ, minim yipul yimb ak niḡiy diḡim. ²¹Niḡnimimb aḡḡiy minḡ biy ma tiksiḡiy; niḡbim

rek nimbip tiksipiyn. Gor minim yipul niñind yimb nuk ak, minim yesek gok yip ma wopsakip ak kunep niñbim.

²²Biynimb an rek minim yesek apay? Mey biynimb Jiysis nup Biyomb Krays mer, bi yikop bap aŋgiy, nup miluk niñbay gok. Nop yip, Ñinuk yip kuyip kirgiy mey, kun ak rek apay. ²³Ñinuk nup kirpay gok, Nop nup kunep kirpay. Pen biynimb Ñinuk nup dipay gok, Nop nup sek dipay.

Gor Kawnan Ak Chinup Minim Niñind Ak Aŋñimb

²⁴Kun ak minim nind niñbik ak, direp giyiŋ mindiy mey, Gor apiymiŋay yip jimñiy mindeniŋambim. ²⁵Kiy apiymiŋay yip jimñiy mindiy mey, Krays biynimb nuk dip gok perper mindeniŋambay aŋgak rek, nimbip giniŋamb.

²⁶Biynimb nimbip tom gispay kun gok, tom gi dand amey, apyap piknimimb rek ayek niñiy, nimbip minj biy tiksipiyn. ²⁷Pen minim kuŋay ma aŋgniŋayn. Gor Kawnan yip mindpim ak mey, nuk key nimbip gos yipund giy ar ak ñek, niñrep giniŋambim. Minim yesek ar gok, gos ñek ma niñniŋambun; yipund giniŋamb ar ak nep, gos ñek niñniŋambun. Kun ak Gor Kawnan gos ñimb rek, Krays nup chingiy nep mindenimimb.

²⁸Ñapan yand gok. Krays nup chingiy nep mindem mey, nuk andkind winiŋamb ñin ak, nup niñon nambiŋ ma giniŋamb; wisimb yapiy nep mindeniŋambun. ²⁹Chin niñbun: Gor Ñinuk Krays suŋ-tep mindiy, miñ yipund gip ar ak nep gip. Kun ak biynimb miñ yipund gip ar ak gipay gok, Gor ñapan nuk mindiy mey, kun gipay.

Gor Ñapan Nuk Mindpun Ak Niñiy Mindrep Ginjun

3 ¹Gor chinup wasemb yimb ay ñapan yand aŋgip ak, wal apiyn. Pen biynimb yikop gok, niñind chinup ma dipay. Bapiy chin ak nup diy rek, chinup dipyap. ²Pen buŋgiy tep yand gok niñim! Miñiy Gor ñapan nuk mindpun ak, kisen key yimb mindoniŋambun. Yerip rek mindoniŋambun ak, niñrep ma gipun ak pen, nuk miseŋ gek nup niñiy, chin biynimb kun gok key yimb ay, nuk mindip rek ak mindoniŋambun. ³Biynimb gos tep kun ak niñbay gok, Krays suŋ-tep mindip rek mindenjun aŋgiy, mindrep yimb gipay.

⁴Biynimb tap siy tap timey gipay gok, Gor nup minim ak timbrikpay. Tap siy tap timey ak key mer; mey minim nup timbrikpun ak nep. ⁵Pen chin niñbun: Jiysis tap siy tap timey gipay rek niñiy awak. Nuk tap siy tap timey ma gip ak mey; ⁶biynimb nuk gek kim kisenimb rek mindpay gok, tap siy tap timey giyiŋ ma mindeniŋambay. Biynimb tap siy tap timey gi mindpay gok, nuk bi yerip rek mindip ak ma niñiy, nup ma chingipay.

⁷Ñapan tep yand gok. Biynimb gunap nimbip nembnemb gi dand kind kiyk okok amniŋgiy rek ayip ak, niñrep ginimimb. Biynimb mindrep

gipay gok, Krays suŋ-tep mindip rek mindpay. ⁸Pen biynimb tap siy tap timey giyiŋ mindpay gok, Seytan bak ayek, nuk tap siy tap timey per gip rek gi mindpay. Ar kun ak nep, Gor Ninuk apiy, Seytan biynimb gok kuyip timey giyiŋgip miñ ak, timbrikak. ⁹Biynimb Gor ñapan nuk mindpay gok, nuk mindrep gip rek mindiy, tap siy tap timey gok asikrep gipay. Nuk mindip rek mindiy, tap siy tap timey gi mindeniŋgiy rek ma ayip. ¹⁰Kun ak Gor ker mindpay akaŋ, Seytan ker mindpay ak niŋrep gipun. Biynimb mindrep ma giy, mam ay gok kuyip wasemb ma aypay gok; Gor ñapan nuk ma mindpay.

Mam Ay Gor Ker Mindpay Gok Kuyip Wasemb Aynimimb

¹¹Pen nimbip kiñiŋ giy aŋgiy per apun rek: mam ay gok kuyip wasemb aynimimb. ¹²Andam ñinuk Keyn gak rek ma ginjun. Nuk Seytan ker mindiy, numam kisen mindrep gak ak nup, miluk niŋiy, pisnep pikayek kumak. ¹³Kun ak mam ay yand gok. Biynimb yikop gok nimbip niŋey miluk yowniŋamb ak, gos kuŋay ma niŋnimimb. Ak yikop kun giniŋgambay.

¹⁴Chin mam ay gok kuyip wasemb aypun rek niŋbun: Gor chinup dek, pisnep kumbay kind ak kirgiy, perper mindeniŋgambay kind ak opun. Biynimb wasemb ma aypay gok, pisnep kumbay kind ak mindnep mindpay. ¹⁵Biynimb mam ay gunap kuyip miluk niŋbay gok, biynimb chip ñapay gok rek ayip. Pen biynimb chip ñapay gok, yergiy perper mindeniŋgambay.

¹⁶Krays chinup simb niŋiy kumak rek, chin mam ay gunap kuyip simb niŋiy, monmon direp ginjun. ¹⁷Biynimb tap kuŋay mindakniŋ, mam ay tap tikdip gok kuyip, simb ma niŋniŋgambay gok, yergiy Bapiy Gor biynimb simb niŋimb rek, gipun aŋniŋgambay. ¹⁸Kun ak ñapan yand gok. Minim nep ma aŋjun, mam ay gok kuyip wasemb yimb ayjun.

Biynimb Gor Nup Chiŋipay Gok Wisimb Yapiy Nep Mindpay

¹⁹Kuyip wasemb yimb ay mey, minim yipul yimb direp gipun ak, niŋrep giniŋgambun. Gor windin yirik ar ak chin nambiŋ ma diy, wisimb yapiy nep mindoniŋgambun. ²⁰Chin key gos par ayiŋ mindoniŋgambun ak; Gor Biyomb yimb gos timund chinup maŋgiysek niŋrep gip ak niŋek, tep ma yimb giniŋgamb. ²¹Kun ak biynimb yand gok niŋim: aŋgip rek giy mey, gos kuŋay ma niŋiy, Gor windin yirik ar ak ñawil ma diniŋgambun. ²²Minim aŋgip rek giyiŋ nup aŋniŋoniŋgambun, tep gakniŋ, aŋniŋgambun rek giniŋgamb. ²³Pen chinup aŋgak rek giniŋ, Ninuk Jiysis Krays nup gosimb niŋiy, mam ay gok kuyip wasemb ayjun. ²⁴Biynimb aŋgip rek gipay gok, nuk kiy yip mindek; kiy pen nuk yip mindpay. Kawnan nuk yokek ap chin yip mindpun ak, nuk yip jimñiy mindpun ak niŋbun.

Gor Kawnan Tep Ak Akaŋ, Tap Key Bap Kuyip Gos Ñimb

4 ¹Buŋgiy tep yand gok. Biynimb Gor minim yesek aŋgrapay gok kuŋay mindpay ak mey, biynimb gunap Gor Kawnan yip mindpun aŋgeniŋgiy niŋrep giy minim kuyip ak dinimimb. Gor Kawnan apay ak pen: Gor Kawnan yipund giy akaŋ, tap gunap key kuyip gos ñek aspay akaŋ aŋgiy niŋnimimb. ²Pen Gor Kawnan ak yip mindiy aŋgniŋgambay, “Bi Jiysis Krays ak, Gor Ñinuk. Nuk biyimb ay owak aŋgniŋgambay.” ³Pen Gor Ñinuk biyimb rek ay ma awak aŋgniŋgambay ak; Gor Kawnan ak yip ma mindeniŋgambay. Tap Krays nup miluk niŋimb bap yip mindiy mey, minim kun ak rek aŋgniŋgambay. Biynimb kun ak rek mindeniŋgambay aŋgey niŋbik. Pen miŋiy gunap mindpay ak; niŋrep ginimimb.

⁴Ñapan yand gok. Nimb Gor biynimb nuk mindpim rek, minim yesek kiyk apay ak, taw achip achip gipim. Kawnan niŋind yimb nimbip gos ñimb ak, kilis timey yimb; kuyip gos ñimb ak, kilis ma mindip. ⁵Kiyk biynimb yikop tap lum biy nimb gok gosimb niŋbay ak mey; tap yikop lum ar biy nimb minim ak aŋgey niŋbay. ⁶Pen chin Gor Ñapan nuk mindpun rek, biynimb Gor nup dipay gok, minim chinup ak dipay. Biynimb nup ma dipay gok, minim chinup ak ma dipay. Ar kun ak Gor Kawnan yip mindiy apay akaŋ, tap bap key gos ñek apay ak niŋbun.

Gor Chinup Wasemb Yimb Ayip

⁷Biynimb tep yand gok. Gor biynimb nuk mindpun ak, penpen wasemb ayjun. Biynimb wasemb aypay gok, Gor nup chiŋgiy, ñapan nuk mindiy mey, wasemb aypay. ⁸Pen biynimb wasemb ma aypay gok, Gor bi biynimb wasemb ayip ak nup ma dipay. ⁹Chinup wasemb yimb ayip rek niŋyaŋ aŋgiy, Ñinuk nokom yimb ak yokek apiy gek, perper mindonjun rek ayip. ¹⁰Wasemb yimb ayep ar ak, chinup kind ak ma tikjakak; Gor kind nuk ak tikjakak. Chinup wasemb ay Ñinuk nup yokek apiy, tap siy tap timey gipun rek simboŋgak.

¹¹Buŋgiy tep yand gok. Nuk chinup kun giy wasemb yimb ayip ak; chin ñapan nuk gok, penpen wasemb ayjun. ¹²Gor nup miseŋ ma niŋbun ak pen; penpen wasemb aypun ak keynep ma gipun, nuk chin yip mindakniŋ gipun. Nuk chin yip mindip ak mey, nuk biynimb wasemb yimb ayip rek gipun. ¹³Chinup Kawnan nuk yokek yip mindiy mey, nuk yip nep mindpun ak niŋrep gipun. ¹⁴Nop Ñinuk bi biynimb di jimñemb ak yokek apek, windin chin key niŋnuk ak mey; biynimb miñmon okok keykey kuyip gos niŋiy yokak ak, niŋrep giy biynimb aŋñimbun. ¹⁵Biynimb Jiysis Gor Ñinuk yimb aŋgiy miseŋ apay gok, Gor kiy yip mindakniŋ, nup chiŋgiy, kun ak rek niŋiy apay. ¹⁶Chin key Gor wasemb ayip ak niŋrep giy, ar kun ak gon amimb.

Gor bi wasemb ayep. Biynimb wasemb aypay gok, nup chinḡey kiy yip mindakniḡ, wasemb aypay. ¹⁷Chin Gor nup gosimb niḡbun gok, Krays mindip rek mindiy, biynimb gunap kuyip direp yimb gipun. Kun ak kor yomb giniḡgamb ak niḡon, jel ma gip. ¹⁸Biynimb penpen wasemb yimb aypay gok, penpen niḡey, jel ma giniḡgamb. Kun ak rek, chin biynimb Gor yip penpen wasemb yimb aypun gok, kunep jel gek ma pirikpun. Biynimb pirikpay gok, Gor nup wasemb yimb ma aypay.

¹⁹Gor nuk key chinup wasemb ayek mey, nup pen wasemb aypun. ²⁰Biynimb Gor nup wasemb aypun aḡniḡgambay ak pen; mam ay gok kuyip miluk niḡniḡgambay ak, yesek nep aḡniḡgambay. Biynimb miseḡ niḡbay gok kuyip, miluk niḡniḡgambay ak, yergiy Gor bi miseḡ ma niḡbay ak nup, wasemb ayniḡgambay. ²¹Gor aḡgak, “Biynimb yip wasemb ayniḡgiy gok, mam ay gok kuyip kunep wasemb ayniḡgiy aḡgak.”

Biynimb Jiysis Nup Dipay Gok

5 ¹Biynimb Jiysis bi Kiyḡ yomb key yimb kond mindiyḡgipun ak nep wip aḡgiy niḡbay gok; Gor ḡapan nuk mindiy, nup wasemb ay, ḡinuk nup wasemb ay gipay. ²Pen biynimb Gor nup wasemb ayniḡgambay gok, aḡgip rek giyiḡ, ḡapan nuk gunap kuyip wasemb ayniḡgambay.

³Gor nup wasemb ay mey, aḡgip rek giniḡgambun. Minim nuk aḡgip kun ak, miker ma gip. ⁴Nup gosimb niḡon, chinup dek ḡapan nuk mindipun ak, biynimb yikop gok miḡ gipay ar ak, gos chinup lipiḡ dand amnimuḡ rek ma ayniḡgamb. Nup gosimb niḡmindon, chinup kond mindek mindrep giniḡgambun. ⁵Chin biynimb Jiysis Gor ḡinuk yimb aḡgiy niḡbun gok, miḡ giy yiwur dipay kun ak kirginiḡgambun; pen biynimb nup gosimb ma niḡbay gok, kirginiḡgiy rek ma ayniḡgamb.

Jiysis Gor ḡinuk Yimb

⁶Jiysis owak ak bi yikop ma owak. Niḡ pikḡeyak, kisen likaḡ yapek kumak. Niḡ nep pikek, Gor ḡinuk ak aḡgiy ma apun; niḡ pikek kisen likaḡ yapiy kumak ak, Gor ḡinuk mindip ak niḡbun. Gor Kawnan nuk ak kunep chinup gos ḡek niḡbun: Jiysis Gor ḡinuk yimb ak mindip. ⁷Kun ak minim ar omiḡal nokom mindip:

⁸Jiysis nup niḡ pikiyak ak, likaḡ nuk yowak ak,

Nop Kawnan ak ḡiyand aḡgiy, chinup gos ḡimb ak.

Minim omiḡal nokom kun ak, jimḡiy ar nokom aḡgip rek, Jiysis Gor ḡinuk nep mindip ak niḡrep gipun. ⁹Biynimb gok aḡgey niḡbun ak, minim nep aḡgey niḡbun; Gor ḡinuk chinup minim aḡgip ak, niḡind yimb aḡgip.

¹⁰Biynimb Jiysis Gor ḡinuk yimb aḡgiy niḡbay gok, Gor yip mindiy, kun giy niḡbay. Pen biynimb Jiysis Gor ḡinuk mer aḡgiy niḡbay gok, Gor

bi yesek angip angiy kun giy niŋbay. ¹¹Nuk Ñiyand ak yoken am gek, perper mindeningiy angak rek, ¹²Ñinuk nup dipay biynimb gok, perper mindeningambay; pen nup ma dipay gok, perper mindeningiy rek ma ayip.

Gor Nup Dipim Rek Ñapan Nuk Mindpim

¹³Nimb Gor Ñinuk chinup di Nop yip jimñimb angiy, nup gosimb niŋbim gok, perper mindeningambim ak niŋrep ginimimb angiy, minj kun biy tiksipiyn.

¹⁴⁻¹⁵Gor nup tep giningamb ar gok angniŋoningambun, angniŋningambun rek nep giningamb ak, niŋrep gipun.

¹⁶Pen mam ay bap tap siy tap timey gey niŋiy, Gor nup angniŋnimimb. Angniŋem, kuyip tip ak dek, nuk yip jimñiy mindeningambay. Pen tap siy tap timey mon key yinŋap amemb rek ak geniŋgiy, Gor nup angniŋnimimb angiy ma asipiyn. ¹⁷Gor tap mer angip gok gipay ak, tap siy tap timey gipay ak pen; tap timey ar gunap gey, Gor niŋiy kirginimuŋ rek ayniŋgamb.

¹⁸Chin niŋbun: biynimb Gor ñapan nuk mindpay gok, tap siy tap timey giyiŋ ma mindpay; Gor Ñinuk kuyip kond mindek, Seytan kuyip dinimuŋ rek ma ayip.

¹⁹Chin niŋbun: biynimb yikop gok maŋgiyseker Seytan ker mindpay; chin pen Gor ker mindpun.

²⁰Gor Ñinuk awak rek, Gor yipund giy ak nup niŋrep gipun. Amemb owep chinup ak, Gor yipund giy ak kond mindip. Gor yipund giy kun ak mey, Jiysis Krays. Nuk gak ak perper mindeningambun.

²¹Ñapan yand gok. Gor chin angiy tap yesek angniŋbay gok, asikrep ginimimb.